



Va ben contecurtârs. Le vin petade. Aromai l'an bisest al pareve no volê plui regalânus une serade cun dentri un poçje di Contecurte, ma in grazie de nestre **Coghe Fuguline**, che e je stade anime e sproc di Vôs de Basse, o vin rivât a cumbinâle.

Al varès di sedi un articul informatîf, chest, ma us disarin ancje cui che al à vinçût e ce che al è stât fat inte serade di premiazion di Sabide, ai 24 di chest mê. Ma intant o vin di dî che **nô di Contecurte o sin contents.**

Contents parcè che l'invît dal Ostîr, di un an fa, a partecipâ a chest concurs di contis curtis par furlan al è stât cjapât sù di plui di cualchi contecurtâr e contents ancjemò di plui che i nestris contecurtârs a vedin fat biele figure. E contents di cjatâsi, di rivâ a fâ un pôc i stupits prime di lei lis contis e di podê dî di vê fat almancul un spettacul di cualchi bande, in chest an sfigât.

Ma vignin a la croniche, ancje parcè che o spietìn seneôs che i autôrs des contis nus mandin i lôr lavôrs - lets dilunc de serade - pacè che o podedis lei lis contis, e no dome l'articul che al fevele di lôr. Da rest, son contis curtis, e noaltris no podevin che jessi **in prime file tal sparnicâ e pupilâ chest "Vôs de Basse".**



Ma scomencin dal inizi, ven a stâi de premiaziom dai fruts, che si è davuelzude tal daspò misdi e che al à viodût vinci la poesie “**La mê mame**” di **Sofia Pinto**, in bande dai premiâts **Davide Fogolini e Luca Turolo**, cun “**Il mâr**” e **Giorgio Pivetta**, cun “**L’Autun**”. E prime il spettacul di **Michele Polo e Giorgio Parisi** (inte foto) che al à gjavade plui di cualchi ridade e cjante cul spettacul “**Une lenghe, un doman**”. E al è stât biel che cundut dal periodi no masse biel, a sedin rivâts in tancj fruts a cjapâ il premi.

La premiaziom dai adults e jere pôc dopo, e a musicâ lis poesiis, dôs di chês che a àn vinçût lis edizioms passadis e lis trê finalistis di chest an, a son stâts nuiemancul che **Jacopo Casadio e Davide Sciacchitano** (o cuissà, forsit a jerin Jacopo Sciacchitano e Davide Casadio, sâstu mai) dai **Luna e un quarto**. A àn fat un grant biel lavôr, metint in musiche poesiis, e cirint cussì di lâ incuintri ae sensibilitât dai poetis che lis vevin scritis. I risultâts a son stât une vore bieie e al va pardabon dât il merit a chescj doi artiscj di vê vût pari bravure. Al valeve la pene di viodi la premiaziom dome par chest esperiment.



E dopo? E dopo e jere la nestre volte! **Ostîr, Famei e Berlon a si son vistûts di ninja-furlans** e armâts di sape, pale e ristiel a si son sfidâts leint lis sîs contis che miôr si son plaçâdis tal concurs. Par jessi precîs, chest la liste dai scuintris, che prest o podarês ancje lei achì su Contecurte:

Torse Sand Creek - La cjase zâl zafaran

La crepe - Une storie piçule

Il perdon di Justin - Fueis



E no us disvelin nancje cui che a son ducj i autôrs, e savêso parcè? Parcè che o sin sigûrs che nus mandaran la lôr conte par podê publicâlê achì su la nestre Osterie e sperin ancje che no sedi la uniche, parcè che o vin voie pardabon di diventâ un pont di riferiment pe leteradure curte furlane.

Ealore, intant che o sin in spiete des contis, o podin però disvelâus cui che al à vinçût.

Prin classificât, sedi par il public, sedi pe jurie, il “nestrì” e podin ben dîlu, **Garzon de Osterie Gianfranco Pellegrini**, cuntune conte pardabon perfete, che no viodin la ore di lei. (E achì o sin sigûrs che e rive, stant che al è inmò sot paron dal Ostîr e nol pues dîsi di

no). **Torse Sand Creek** la sô conte.

Ma lis sorpresis no finissin chi. Al è capitât che la seconde classificade e sedi stade **Fueis**, induvinait di cui? De nestre Sartore **Astrid Virili!** Che al è clâr e je stade premiade dal Ostîr in persone. Fueis, il so toc, e o vin savût che je e je ancjemò in estasi e no crôt di jessi rivade cussì ben, stant che e veve scrit la conte dome parcè che “L’Ostîr la finìs di rompi i durions”.



Insome... O podìn dì che scrivi par contecurte al fâs ben, Ancje parcè che al jere ben cualchi contecurtâr platât ta chês altris contis, e ancje chês no viodin la ore di fâusalis lei.

Tierç classificât, **Diego Navarra**, cuntune conte storiche, **La crepe**, une vore ben curade, e segnalât **Davide Ballaminut**, cuntune **Storie piçule**. Int che o sperin di viodi prest inte nestre Ostarie cu gnovis contis.

E no stin dismenteâsi des premiazioms de poesie, che a àn viodût come vincidôr un adorabil **Stefano Lombardi**, cul componiment “Lagrimis”. **Giacomo Vit**, cun “Mê mari e il mâr” e **Chiara Savorgnan**, cun “Nono” a son stâts chei altris doi premiâts.

Insome... ce dî? Che e je stade une bieie serade. Che **ARLeF, SFF e Sportel Furlan Basse Furlane** cun duçj i siei Comuns a àn dât un grant contribût e che la nestre Coghe Fuguline e je stade super, a meti dongje dut.

Ma savêso quale che je la gnove finâl? Che e je jessude une publicazion cu lis contis premiadis e lis poesiis des ultimis trê edizions, Vôs de Basse, par cure propite de Filologjiche Furlane, regalade a chei che a jerin te serade e che - gnove inmò plui bieie - **la cuarte edizion di Vôs de Basse, tal 2021, si fasarà!** E nô o sin une vore contents e za di cumò o tachin a dî che **bisugne saltâ fûr dal scûs e fâ cressi lis robis che a meretin cressi**. Come cheste.